

Tunumi inuussutissarsionermik ataatsimiittaliamik pilersitsinissaq pillugu aalajangiiffigisassatut siunnersuut.

Kommunalbestyrelsimut ilaasortap Mala Høy Kukop (S) Kommunalbestyrelsimut siunnersuutaa

Aalajangiiffigisassaq

J.nr.: 01.01.07

Suliffeqarfimmut Kiffartuussivik - kommunaldirektøri Lars Møller-Sørensen /LMS

Suliassamik eqikkaaneq

Kommunalbestyrelsimut ilaasortaq Mala Høy Kuko (S) novembarip 5-anni 2018

Kommunalbestyrelsimut aalajangiiffigisassatut Tunumi inuussutissarsionermik ataatsimiittaliamik pilersitsinissaq pillugu siunnersuuteqarpoq.

Inassuteqaat

Suliffeqarfimmut Kiffartuussiviup Kommunalbestyrelsimut inassuteqaatigaa:

- Mala Høy Kukop (S) siunnersuutaa Kommunalbestyrelsimi oqaluuserineqassasoq taamatullu suliap ingerlaqqinnissaa aalajangiiffigineqassasoq

Suliassamik saqqummiussineq

Kommunalbestyrelsimut ilaasortaq Mala Høy Kuko (S) novembarip 5-anni 2018

Kommunalbestyrelsimut aalajangiiffigisassatut Tunumi inuussutissarsionermik ataatsimiittaliamik pilersitsinissaq pillugu siunnersuuteqarpoq.

Siunnersuuteqarnermut tunngavilersuut:

Ukiuni arlaqalersuni inuutissarsionermi ineriartorneq Tasiilami assigiinngitsutigut sulissutigineqarnikuuvoq. 1960-kkut ingerlaneranni Saarullinnik aalisarneq bungarninillu siuarsaanirlutik angallatinik tunniussisoqarnikuuvoq. 1960-kut naalersoq tutunnik nuussisoqarnikuuvoq, ukiut arlaqartut qaangiummata 1980-kkut naalersut tutut tammakarnikuupput. Qaleralinnik Sermiligaami misileraanerup kingornatigut angallatinik 1990-kut naalersut pilersuisoqarnikuuvoq. Ajoraluartumilli inerisaaneq ammuinnaq ingerlanikuuvoq, ajornerpaamillu kinguneqarmat Kuummiuni aalisakkanik tunitsivituaq fabrikki matusariaqarsimavoq ukiaagaa 2014-mi. Assigiinngitsut misileraanerit qullersaqarfimminngaaniit Tasiilap eqqaani aamma ittoqqortoormiut eqqaanni ingerlanneqarnikuupput. Kiisalu aamma immami qassusersornermik kivisitsisarnissamik inatsisissaq 2014-mi akuersissuteqartoqarnikuuvoq.

Qangaaniilli tunup imartaani aalisakkanik assigiinngitsunik kilisaatit angisuut mikisullu aalisartuarnikuupput, ukiunilu kingullerni malunnartumik nunamut qanittumik kilisaatinik aalisartartut qanittumi aalisartalernikuullutik. Avaleraasartooriallu malunnartumik tunup avataani aasakkut aalisangaatsiartalernikuullutik.

Ukiuni nutaaliaasuni tunup imartaa aalisarnikkut ineriartortitserusuttut imaaginnavittut kalaallit nunnaanersut, qallunaat, Island-ermiut, savalimmiormiut allaammi nunamiut allat tusartuarpagut. Inerisaarusullutimmi iliuseqarniartartut tupinnartuliaanngillat kalaallit nunattami kangia (tunu) suli annertunerusumik imartaa attorneqarnikuunngimmat kitaanut sanilliullugu.

Ukiuni kingullerni Naalackersuisoqarfimminngaaniit kiisalu kommuneqarfimmi siuttuninngaaniit tunumi aalisarnerup inerisarneqarnissaanik sulissuteqarniartut atsiogatigiittoqarnikuuvoq. Tamatut isumaqatigiissuteqarnerat neriummerneramik nunaqqataasunit tigulluarneqarnikooqaaq.

Inuutissarsionikkut siuarsaanissamut tunumut tunngasut assigiinngitsut kitaaniit inuttalerneqarlutik suliat aalajangersaaffigineqarnikuupput ukiuni pereernikuni. Tamanna soorunalimi pisussaaffimmi naapertuineramik aallaaveqartarmat allanngortinneqarsinnaanngilaq. Turisteqarnermik qujanavissumik arlalitsigut suliffissaqartitsiniarneq ingerlanneqarnikuulerpoq piffinnik

assiginngitsunik, innuttaasut akuuffigilluagaannik. Kiisalu ukiukkut aamma qimussiussisarneq qangaaniilli kulturi ingerlanneqarnera tamanut iluaqutaaqisoq ingerlatinneqartuaannarpoq.

Ullutsinni politikkerit nunatta ineriartorneranik oqariartortuartsuugut, kiisalu innuttaasut oqartussaanerannik akuutinnissatsinnik pingaartitsiuartugut, taamatut pingaartitsinitsinnik tunaartaqarluta pissusissamisoortutut isigissavara tunuminngaaniit inuussutissarsiornermik ataatsimiititaliamik pilersitsinissamik peqalernissaanik. Uanimi nunaqqataasut aggerfimminnik namminneq peqataasutut pilersaarusoqataasinnaanerannik akisussaaffimmik peqarlutik, namminnerlu aggerfitsik inerisassallugu peqataasinnaanissaanik akisussaaffimmik tunineqarnissaat pissusissamisoortutut uanniit isigivara, peqataanissaallu inutissarsiornerup siunissami qanoq ittuunissaanik titartaqataanissaat innuttaaqataasut inissaminiittutut isigivara.

Ukiunimi qaangiutereersunut pissutsit inuutissarsiorneq eqqarsaatigalugu iluatsittarsimangitsut ataatsimiititaliamik pilersitsinikkut, pereersut ilinniarfigalugit pitsaanerumik periuseqarnikkut pinaveersaarneqarsinnaanerat anguneqarsinnaassavoq.

Ukiunimi pereernikuni inuutissarsiornikkut pilersitaagaluit siuarsaernerut siunertallit iluatsinngitsoortartut, qaminneqaannartutullu pineqartartut, inerisarnissaannullu qaqilerneqaqqittanngitsut naammattoortarneqarnikut arlaqarput. Inuutissarsiornermut siunertaqartunik tunngasut pilersitaagaluit, iluatsinngiffissaminnut aqqummut pinikunut nalugineqartarnikuugaluit annertunerumillu iliuuseqarfigineqartanngitsut nunaqqataasuninngaaniit takornartaajunnaanikuupput. Tamakku pereernikut inerisarneqaqqinnginnerisa kingunerisarpaa innuttaasunut tamanut siursaataanani akisuumillu nunaqqataasunut kinguneqalersarneranik.

Ataatsimiititaliaq pilersinneqassappat pisussaaffilerneqarsinnaavoq inuutissarsiornermik inerisagassamik pilersitsisoqartillugu malinnaalluarnissaanik, kiisalu tunup siunissami inuutissarsiornikkut inerisarneqarnissaanik namminneq innuttaasut peqataanermikkut oqalliseqataanermikkullu pilersaarusoqataasinnaanissaanik. Arlaatigut unuutissarsiornermut sammisumik ineriartornissamut pilersitsisoqartillugu, malunnarsippallu inerisarniagaq toraakkaminut sanioqqutsisoq, aarlerinartumut aallartoq, taava atorfisaqartitsineq aallaavigalugu ataatsimiititaliaq uparuaanissaminik arlaatigut aaqqiissutaasinnaasumik ujartuilluni, imaluunniit tinneraasinnaanissaanik akisussaaffeqarnissaanik pisussaaffilerneqarsinnaavoq.

Kalaallit nunatta tunuani taaneqartartoq nunaq imarpillu annertoorujussuuvoq, siunissarlu eqqarsaatigalugu inerisagassat pingaaruteqartussaasut unikkunnanngillat. Nunarsuarmimi ineriartorneq inuutissarsiornikkut nerisassatigut niuerneq assigisaatigullu sorpassuatigut sulissutiguarneqartuuvuq.

Siunnersuuteqartutut isumaqarpunga una namminermi piffimmi piginnittutut inuutissarsiornermik ataatsimiititaliaqarnissaq pinngitsoorneqarsinnaajunnaarnikuusoq. Tassami siunissaq ungasinnerusoq peqqissaartumik inuutissarsiornikkut piffimmi aggerfigisamik innuttaasuninngaaniit nalornissuteqarfigineqarnani inerisaanissaq innuttaasuniit akisussaaqataaffigineqarluni akuuffigineqartuartaqalerpoq. Innuttaasunik peqataatitsilluarneq ataatsimiititaliakkoolugu inuussutissarsiornerup siuarsarneqarniissanik isumaqarpunga pinngitsoorneqarsinnaajunnaartoq.

Pissutsit iluatsinngitsoornikuusut inuutissarsiornermut tunngasut piffissanngorsorivara politikkkikkut tamatta qanga kukkussutaasimasut uteqqinnginissaat akisussaassuseqarluartumik suleqatigiiffigissagippat, aqutissanillu pitsaanerusunut periusissanik ujartueqatigiinnissatsinnik pisussaaffeqatigiittariaqartugut. Taamaammat Kommunalbestyrelsi neriuuteqarfigalugu tunngavilersuutigisakkalu paaseqqullugit siunnersuutigisara akuerineqarnissaanik kaammattuuteqarpunga.

Aaqqiissutissatut siunnersuut – suliatigut naliliineq

Borgmesterip Allatseqarfiata innersuussutigaa, siunnersuut ataatsimiititamut susassaqtumut ingerlateqqinneqassanersoq Kommunalbestyrelsimi aalajangerneqassasoq.

Aningaasaqarnikkut sulisoqarnikkullu naliliinerit

Aningaasatigut sulisoqarnikkullu naliliinerit, suliap ataatsimiititamut susassaqtumut ingerlateqqinnissaanut, Kommunalbestyrelsip aalajangiinerani suliaput ilaatinneqassapput.

Inatsisitigut tunngavissaq allakkallu tunngaviusumik uppernarsaatitalit

Kommunit aqunneqarnerat pillugu Inatsisartut inatsisaat nr. 22, 18. november 2010-meersoq § 13. Kommunalbestyrelsimi ilaasortap kialuunniit kommunip susassaqarfii pillugit apeqqutit suulluunniit kommunalbestyrelsimut saqqummiussinnaavai aammalu tamakku pillugit aalajangiinissanut siunnersuutiniq saqqummiussinnaalluni. Ataatsimiititaliat borgmesterilu paasisutissanik taassuma piumasaanik, kommunalbestyrelsillu aalajangernissaanut inatsisitigut aalajangersakkat sukkulluunniit malinneqartussaataasut pillugit kommunalbestyrelsimut nalunaaruteqassapput.

Kommunalbestyrelsip suleriaasissaatut aalajangersagaq §3:

Ilaasortaq, kingusinnerpaamik ataatsimiiffissaq sioqqullugu ullut 14-it qaangiutsinnagit suliassamik sularinneqqusilluni allakkatigut qinnuteqassaaq, suliassaq taanna borgmesterip ileqquusumik ataatsimiinnissap tullianut oqaluuserisassanut ilanngutissavaa.

Ingerlariaqqinnissaq

Kommunalbestyrelsip aalajangerneru Borgmesterip Allatseqarfianit allaffissornikkut sularineqassaaq.

Aningaasaqarnermut Allatseqarfimmit oqaaseqaatit

Aningaasaqarnermut Allatseqarfimmit oqaaseqaatinik pissarsiniartoqanngilaq.

Innuttaasunik peqataatitsineq/attaveqaqatigiinneq

Soqanngilaq.

Ingerlatsivinniit allaniit oqaaseqaatigineqartut

Ingerlatsivinnit allanit oqaaseqartitsisoqanngilaq.

Ilanngussat

Soqanngilaq